

**LISTOVI..**

**GRAČANIČKI GLASNIK**  
časopis za kulturnu  
historiju

Broj 37, godina XIX  
maj, 2014.

© Monos 2014

# Listovi gračaničkog kalendara (novembar 2013. – maj 2014.)

---

**Doc. dr. Omer Hamzić**

---

11. XII. 2014

**Promocija 36. br. "Gračaničkog glasnika"**

U sali Muzičke škole u Gračanici održana je promocija 36. broja časopisa za kulturnu historiju "Gračanički glasnik", sa temom "Deset godina od smrti predsjednika Alije Izetbegovića". Svoje sjećanje na dvije ratne posjete predsjednika Izetbegovića Gračanici, lična iskustva i impresije u kraćem emotivnom iskazu iznio je pukovnik Ibrahim Nurkić, ratni načelnik Štaba Operativne grupe 2 Armije RBiH. Publika je sa zanimanjem propratila izlaganje jednog od najistaknutijih ratnih oficira sa šireg prostora Gračanice i njene okoline u ratu za Bosnu i Hercegovinu 1992.-1995. Gost promocije je bio dr. sc. Adnan Jahić, profesor novije historije na Filozofskom fakultetu Univerziteta u Tuzli, koji je govorio o predsjedniku Izetbegoviću kao istaknutoj i značajnoj historijskoj ličnosti savremenog doba na ovim prostorima. Sadržaj novog broja predstavio je Edin Šaković, a izabrane misli, rečenice i citate Alije Izetbegovića pročitao je Nedim Hadžiaganović, učenik Gimnazije "dr. Mustafa Kamarić", uz klavirsku pratnju profesora Miralema Mejremića. Promocija je izazvala značajnu pažnju građana.

24. XII. 2013.

**Tradicionalna manifestacija "Izbor sportiste godine općine Gračanica za 2013."**

Melita Imširović, članica Ženskog odbojkaškog kluba, proglašena je najboljom sportskinjom, a Almir Osmanhodžić, kapiten Rukometnog kluba – najboljim sportistom općine za 2013. godinu. Ekipne nagrade pripale

LISTOVI...

su nogometašima “Bratstva” i nogometašicama ŽNK “Orahovica 74”. Za najuspješnijeg trenera proglašen je Nusret Muslimović, trener juniora NK “Bratstvo” sa kojima je, slično kao i sa prvim timom, postigao sjajne rezultate. Titula najuspješnijeg sportskog radnika je pripala Nusretu Heliću, načelniku Općine Gračanica. Dodijeljene su i nagrade u juniorskoj (Hazema Letić i Dino Hamidović), kadetskoj (Amila Šuša i Riad Nedić), te pionirskoj kategoriji (Belma Mujanović i Namik Helić).

Posthumno priznanje za svoj doprinos u razvoju rukometnog sporta u Gračanici dobio je Halid Duraković, koji je odavno na spisku sportskih legendi Gračanice. Priznanje je iz ruku profesorice Hadžije Grbić (članice Žirija) preuzeo Halidov najbolji prijatelj, čuveni rukometaš, doajen gračaničkog sportskog novinarstva i naš saradnik, Emir Tihić. Dodijeljena su i posebna priznanja za doprinos u razvoju sporta na području ove općine a ona su pripala nogometašu „Bratstva“ Musi Diabangu, novinaru Fahrudinu Kurtoviću, nogometašici Amili Grbić, sportskim radnicima Safetu Begoviću i Hamzaliji Okanoviću, te Karate klubu “Gračanica”. Osnovna škola Lukavica proglašena je za najbolju školu, a nastavnik iz ove škole Mevludin Hasić dobio je priznanje kao najbolji. Posebno priznanje dodjeljeno je i profesoru Bilalu Begoviću za razvoj rukometa i fizičke kulture, dok je vrijedni sportski radnik Džemaludin Šarac dobio priznanje za razvoj biciklističkog sporta. Posebna priznanja uručena su firmama “Terme” i “Fragmat” za podršku koju daju gračaničkom sportu.

26. XII. 2013.

### **Petnaesta sjednica Općinskog vijeća Gračanica: jednoglasno usvojen budžet za 2014. godinu**

Kako je u obrazloženju istakao načelnik općine Nusret Helić, sve primjedbe tokom javne rasprave ozbiljno su razmotrene, veći broj je prihvaćen, pa je predloženi Budžet od 11.332.000 KM u odnosu na Nacrt veći za 13

procenata. Nakon što su razmotreni i djelimično ili u cijelosti usvojeni amandmani koji su stigli od strane vijećničkih klubova SDP, SDA, BPS-a, kao i nekolicine vijećnika, te od samog predlagača – budžet za 2014. godinu se povećao na cifru od 11.456.000 KM – i u tom obimu usvojen. Službeno je naglašena razvojna komponenta budžeta, te istaknuta činjenica da su u njemu “sve mjesne zajednice podjednako zastupljene”, što je i “odraz interesa većine građana naše općine”.

**Nakon jednoglasne podrške Budžetu, na isti način su usvojeni i Program rada Općinskog vijeća, te Programske aktivnosti Općinskog načelnika u 2014. godini, kao i Informacija o stanju zaštite građana od neeksplozivnih i minskoeksplozivnih ubojnih sredstava na području Općine Gračanica u 2013. godini, te Informacija o analizi talasa poplavljenog poljoprivrednog područja u Tuzlanskom kantonu–sliv rijeke Spreče, područje Gračanice u 2013. godini.**

19. I. 2014.

### **Evropska turneja gračaničkih gimnazijalaca – ljubitelja klasične i operne muzike: jedinstven primjer edukacije i kulturnog uzdizanja mladih**

Od 13. do 19. januara učenici Gimnazije “Dr. Mustafa Kamarić” izveli su “Evropski operni maraton”, koji već nekoliko godina zaredom organizuje i predvodi jedan od rijetkih istinskih entuzijasta među prosvjetnim radnicima, profesor njemačkog jezika i ljubitelj operne umjetnosti Jasmin Mujkić. U šest dana, učesnici ove turneje pogledali su tri opere, jedan balet i jednu operetu: “Don Giovanni” u Beču, “Labudovo jezero” u Bratislavi, “Veselu udovicu” u Dresdenu, “Nabuko” u Pragu i “Boheme” u Budimpešti. Pedeset učenika – putnika, članovi operne sekcije (u kojoj se razvija ljubav prema umjetnosti, ali uče i evropski jezici), već su u školi bili pripremljeni za ovakve poduhvate. Na sličnim turnejama u prošle tri godine već su imali priliku pogledati prestižne operne

predstave u Sarajevu, Zagrebu, Beogradu, Novom Sadu, Budimpešti, Pragu, Mannheimu, Beču... Ovogodišnja “operska turneja” u pet uzastopnih dana u pet različitih evropskih metropola krana je svih dosadašnjih aktivnosti.

Ovakav poduhvat bio bi nemoguć bez podrške i pomoći brojnih Bosanaca i Hercegovaca, posebno mladih sa šireg područja Gračanice, koji žive, rade ili se školuju u navedenim evropskim gradovima.

Govoreći o značenju organizovanog pristupa i dobroj pripremi učeničkih posjeta ovako prestižnim kulturnim događajima sa nemjerljivim edukacijskim i kulturološkim efektima za mlade generacije (izložene agresiji kiča i šunda)–nije na odmet spomenuti da je cijelo ovo putovanje učenike (pojedinačno) koštalo manje od 200 €, u što je uključen prijevoz, smještaj, doručak, osiguranje i ulaznice za operu (uz napomenu da karta za najbolje mjesto u bečkoj operi košta npr. 250 €, a u drezdenskoj 100 €). Svi važniji mediji u BiH su ovaj događaj tretirali u najudarnijim terminima, što daje nadu da ovo neće biti “samo incident” ili gračanički eksperiment i da se prave vrijednosti kod nas malo po malo počinju prepoznavati i priznavati.

Ovogodišnji poduhvat profesora Jasmina Mujkića i njegovih učenika podržao je i gračanička firma “Eurogalant”, a značajna je bila i podrška i pomoć Goethe instituta iz Sarajeva.

24. I. 2014.

**Nakon Gračanice, 36. broj „Gračaničkog glasnika”, posvećen desetoj godišnjici smrti Alije Izetbegovića, promovisan i u Gazi Husrev-begovoj biblioteci u Sarajevu**

Organizatori promocije su bili: Izdavačka kuća „Monos“ Gračanica, Internacionalni univerzitet u Sarajevu (IUS), Gazi Husrev-begova biblioteka i JU Muzej Alija Izetbegović 1925.-2003., a glavni koordinator g. Nihad Halilbegović iz Sarajeva, Gračanlija po rođenju i dugogodišnji saradnik Glasnika.

Na početku promocije, u ime organizatora, obratili su se rektor Internacionalnog univerziteta prof. dr. Yücel Oğurlu, direktor Muzeja “Alija Izetbegović” Adnan Žiško, te predstavnica Gazi Husrev-begove biblioteke Šahsena Đulović, a potom su riječ uzeli promotori, koji su kroz svoja izlaganja podsjetili na državničko i političko djelovanje rahmetli Alije Izetbegovića, koji je, prema njihovim riječima, bez sumnje bio najznačajnija bošnjačka i bosanskohercegovačka politička ličnost u modernoj historiji. Dr. sc. Omer Hamzić, glavni i odgovorni urednik “Gračaničkog glasnika”, upoznao je goste sa projektom ovog časopisa, te ukratko predstavio zadnji broj.

Mr. sc. Emir Hadžikadunić sa Internacionalnog univerziteta u Sarajevu, Gračanlija po rođenju i nekadašnji ambasador Bosne i Hercegovine u Iranu, u svom je izlaganju naglasak stavio na državničko djelovanje Alije Izetbegovića u složenim međunarodnim političkim prilikama, ukazavši na njegova najvažnija postignuća. Historičar dr. sc. Zlatko Hasanbegović, viši stručni saradnik sa Instituta za društvena istraživanja “Dr. Ivo Pilar” u Zagrebu (inače, obiteljskim porijeklom vezan za Gračanicu), u svom je izlaganju ukazao na neke od najvećih historijskih zasluga Alije Izetbegovića, kao državnika i političkog lidera, kritički se osvrnuvši na različite krive interpretacije, neutemeljene stereotipe i mitove u bosanskohercegovačkom javnom diskursu, a također je ukazao i na neke temeljne teze Izetbegovićeve političke filozofije, koje su izuzetno primjenjive i u aktualnom političkom trenutku. Državničko i političko djelovanje Alije Izetbegovića, istakao je Hasanbegović, obilježeno je sa dva ključna postignuća, a to su međunarodno priznanje države Bosne i Hercegovine i okončanje procesa nacionalne izgradnje bosanskohercegovačkih muslimana. Promocija Gračaničkog glasnika izazvala je zapažen interes u Sarajevu. Velika sala novog, tek otvorenog objekta Gazi Husrev-begove biblioteke bila je ispunjena do posljednjeg mjesta. Među posjetiocima bio je i veliki broj

uglednih naučnih radnika i društvenih djelatnika, te drugih javnih ličnosti, kao i članovi porodice rahmetli predsjednika Izetbegovića, uključujući i njegovog sina Bakira, aktualnog člana Predsjedništva Bosne i Hercegovine. Opće je mišljenje da se Gračanica ovoga puta na najbolji način predstavila u Sarajevu.

30. I. 2014.

### **Šesnaesta sjednica Općinskog vijeća Gračanica**

Na početku sjednice, glasovima vijećničke većine (SDP, SBB, BPS i Naša stranka) donesena je Odluka o objavljivanju javnog oglasa za imenovanje članova Općinske izborne komisije Gračanica, koju kritičari i sumnjičavci u zapuštenom i malograđanskom lokal-političkom prostoru posmatraju kao tijelo "izmišljeno" za "udomljavanje" poslušnih i podobnih, te namirivanje računa i sitne trgovine među strankama koje participiraju u Općinskom vijeću i (posebno) čine vijećničku većinu. Nakon prethodne tačke, nije bilo interesa vijećnika o značajnijoj raspravi o šablonski pisanim i neinteresantnom *Izveštaju o rješavanju upravnih predmeta u službama za upravu Općine Gračanica u 2013. godini*, koji je jednoglasno usvojen. Više rasprave bilo je povodom *Informacije o stanju sigurnosti na području općine Gračanica u 2013. godini*. Nakon uobičajenog "propitkivanja" komandira Policijske uprave Gračanica Safeta Ibrahimovića, i ova je informacija jednoglasno je usvojena. Do kraja sjednice jednoglasno je usvojena i Informacija o uticaju Zakona o promjeni namjene poljoprivrednog zemljišta na postupak izdavanja odobrenja za građenje objekata, sa inicijativom za izmjene i dopune Zakona

4. II. 2014.

### **Otvorena nova fabrika za proizvodnju plastične ambalaže za prehrambenu industriju "Helioplast" i RPC "Superfos"**

Radi se o otvaranju i spajanju novoizgrađenih pogona gračaničkog "Helioplasta" sa RPC "Superfos", jednim od pet klastera u okviru

britanske firme RPC Group Plc (Rigid Plastic Packaging). Riječ je o lideru u proizvodnji ambalaže koja posluje širom Evrope i SAD-a i koja je u "Helioplastu" prepoznala ozbiljnog partnera, spremnog da, zahvaljujući kvalitetu proizvoda i postignutim rezultatima, konkuriše i na najzahtjevnijim tržištima. Na ovaj način je u Bosnu i Hercegovinu, odnosno Gračanicu, došao investitor koji ima proizvodne pogone u sedamnaest zemalja i koji zapošljava 7.200 radnika. Kako je partnerskim ugovorima utvrđeno, RPC "Superfos" bit će vlasnik 80% "Helioplasta", dok će stari vlasnici zadržati preostalih 20 procenata.

Kako je istakao predstavnik RPC-a, Pim Vervas, *"o ovom projektu počeli smo razgovarati još 2010. godine. Naša međusobna komunikacija je bila izrazito dobra. Nismo s susretali sa nekim većim problemima. Naš primarni cilj je ovdje da pomognemo dalji rast ove kompanije, da joj osiguramo nova tržišta"*. Gračanički "Helioplast" se dobro uklapa u ove koncepcije. Njihovi planovi podrazumijevaju nastavak ustaljene prakse u komunikaciji sa kupcima, uz dosadašnji – izuzetno uspješan i sposoban menadžment. Kako su kazali, sposobnost RPC-a leži u tome da mogu donijeti novac i njihov primarni cilj u Helioplastu je njegov rast i dalje razvijanje.

Obraćajući se prisutnim gostima, suvlasnik "Helioplasta" Suad Helić istakao je kako je ulazak u ovo partnerstvo dobra osnova i prilika za još brži razvoj firme, te kako se u narednom periodu planiraju nova ulaganja, dodatno širenje firme i nova zapošljavanja

Svečanosti su, pored predstavnika britanskog partnera (Pima Vefvasa i Rene Valentina), prisustvovali i brojni gosti: francuski ambasador u Bosni i Hercegovini Roland Gilles, predstavnici ambasade Velike Britanije u BiH, premijer Tuzlanskog kantona Sead Čaušević, načelnik općine Gračanica Nusret Helić, kao i brojni gračanički privrednici i poslovni prijatelji "Helioplasta".

6.-7. II. 2014.

**Nasilni protesti u Bosni i Hercegovini: zapaljene zgrade kantonalnih vlada, napad na Predsjedništvo, uništeni fondovi Arhiva Bosne i Hercegovine, spaljena državna zastava...**

Višemesečni protesti radnika uništenih tuzlanskih tvornica početkom februara 2014. godine su se rasplamsali u velike demonstracije. Različite grupe i pojedinci su putem društvenih mreža pozivali nezadovoljne građane na ulice, što je kulminiralo u četvrtak i petak, 6. i 7. februara. Nezadovoljni dotadašnjim ignorantskim odnosom kantonalne vlade i premijera, radnici i ostali nezadovoljni građani su se prvog dana protesta sukobili sa policijom koja je osiguravala zgradu... Njihovi zahtjevi su ubrzo prerasli u traženje ostavke premijera i njegove, kako je predstavnik radnika kazao u izjavi za medije, “fašističke i staljinističke” vlade. Kantonalni premijer Sead Čaušević je odbio obratiti se demonstrantima, a intervenirale su i jedinice specijalne policije. Demonstranti su kamenovali zgradu vlade i došlo je do sukoba sa policijom, u kojoj je veći broj policajaca i demonstiranata povrijeđen...

Nasilni protesti i sukobi u Tuzli su bili “okidač” i za druge gradove u Bosni i Hercegovini, tačnije u Federaciji BiH, tačnije u onim dijelovima Federacije u kojima većinsko stanovništvo čine Bošnjaci: Sarajevo, Bihać, Zenica, dio Mostara... Nezadovoljstvo građana je kulminiralo, ali je u svemu tome uloga nekih pojedinaca i grupa koji su to nezadovoljstvo pokušali iskoristiti za neke svoje ciljeve bila, kako se stvari poslije pokazuju, veoma istaknuta...

Začuđujuće, drugog dana nasilnih protesta u Tuzli policija, prema izjavama neposrednih učesnika i svjedoka, nije pružala gotovo nikakav otpor, a potom se potpuno povukla, prepustivši zgradu Kantonalne vlade na nemilost demonstrantima, među kojima su već dominantnu ulogu preuzele očito huliganske skupine. Zgrada vlade Tuzlanskog kantona je demolirana i zapaljena, a skupine

demonstiranata su krenule prema Kantonalnom sudu i zgradi općine Tuzla, koju su također zapalili...

U Sarajevu, bilo je još gore: spaljena je zgrada vlade Kantona Sarajevo, napadnuto je i zapaljeno Predsjedništvo Bosne i Hercegovine, spaljena je i državna zastava ispred njega, a najgore štete je – “ni kriv ni dužan” – pretrpio nacionalni i državni arhiv, smješten u Predsjedništvo. Jedan depo, i to upravo onaj koji je sadržavao najvažniju i najvrjedniju građu, potpuno je uništen...

Politički epilog svih ovih dešavanja bile su ostavke nekoliko kantonalnih vlada. Ostavku je podnio i premijer Tuzlanskog kantona, Sead Čaušević. Od trojice Gračanlija, koji su do sada bili na čelu kantonalne vlade, Čaušević je drugi koji je na neslan način okončao svoj mandat.

6. II. 2014.

**Protesti i u Gračanici: odjek događanja u Tuzli, Sarajevu i drugim dominantno bošnjačkim gradovima Federacije BiH**

Nekoliko desetina građana se okupilo pred općinom Gračanica, u želji da iskažu podršku demonstrantima u Tuzli. Među demonstrantima je bio i veći broj obespravljenih radnika gračaničkih firmi “Grafopak”, “Fortuna” i “Olimp”, te ostalih građana, nezaposlenih, predstavnika boračkih populacija, kao i omladine sa anarhističkim obilježjima. Za razliku od predstavnika kantonalnih vlada, načelnik općine Gračanica Nusret Helić je iskazao političku odgovornost, te smogao hrabrosti da izađe pred demonstrante. Otrpjevši optužbe, psovke i vrijeđanja, iskazao je načelnu podršku njihovim zahtjevima, pozvavši nekoliko predstavnika na razgovor u svoj kabinet, gdje im je obećao podršku sa lokalnog nivoa vlasti za sve njihove zahtjeve. To je svakako “otupilo oštricu” gračaničkih demonstracija, koje su se “preselile” na raskrscnicu ispred BKC-a. Nakon kratkotrajne blokade saobraćaja, protesti su okončani bez incidenata.

18. II. 2014.

**Vanredna sjednica Općinskog vijeća: odgovor na zahtjeve demonstranata (ili onih koji se predstavljaju da govore u ime demonstranata)**

Protesti u Gračanici su poslužili anonimnim pojedincima ili grupama da “u ime naroda” formuliraju i određene zahtjeve, šireći ih putem interneta i društvenih mreža, tražeći, između ostalog smanjenje vijećničkih paušala, deprofesionalizaciju funkcije predsjedavajućeg Općinskog vijeća, smanjenje plaća načelnika i šefova općinskih službi, otpuštanje nekih nezakonito primljenih radnika u Općini itd. Iako je bilo upitno ko je zapravo iza tih zahtjeva stajao i koliko su oni zaista odražavali probleme i zahtjeve građana koji su u Gračanici protestovali, općinska izvršna vlast ih je ozbiljno shvatila, sačinivši posebnu Informaciju u vezi sa protestima radnika i građana i poduzetim mjerama i aktivnostima lokalne vlasti u cilju bržeg rješavanja pokrenutih pitanja i problema, koja je prezentirana na ovoj vanredno zakazanoj sjednici Općinskog vijeća – i jednoglasno usvojena.

27. II. 2014.

**17. sjednica Općinskog vijeća - prihvaćen izvještaj o radu Općinskog načelnika u 2013., te zakazana posebna rasprava o težim problemima**

Na početku sjednice, vijećnik SDA Mirza Omerdić je u ime kluba vijećnika ove stranke inicirao održavanje vanredne sjednice Općinskog vijeća, na kojoj bi se razmatrala primanja u gračaničkom javnom sektoru. Prethodnih dana, inače, pojavile su se informacije o enormno velikim plaćama, naknadama i drugim privilegijama čelnika nekih javnih preduzeća i ustanova u Gračanici, koja su premašivala čak i plaće članova Predsjedništva BiH, dosežući iznose i do 9.000 KM. Načelnik općine Nusret Helić je pojasnio da je održan sastanak sa direktorima i predsjednicima upravnih i nadzornih odbora javnih ustanova i preduzeća, na kojem je razmatra-

na aktuelna situacija, uključujući visinu primanja i na kome je zaključeno da se do kraja sedmice dostave podaci o plaćama i drugim primanjima direktora i uposlenih, te da će detaljan pismeni izvještaj biti pripremljen već naredne sedmice i dostavljen službi Vijeća. Uslijedila je kratka pauza i zasjedanje kolegija Vijeća na kojem je dogovoreno da se vanredna sjednica Vijeća održi 18. 3. 2014. godine, na kojoj će se razmatrati izvještaji o visini primanja u javnom sektoru na području općine, te smanjenju vijećničkih paušala i drugih naknada. U nastavku redovne sjednice, uz obrazloženje Općinskog načelnika u kome su izneseni podaci o racionalnom upravljanju općinom koja upošljava 115 radnika, uz detaljan pregled po službama uključujući i vatrogasce, te o visini njihovih primanja, razmatran je *Izvještaj o realizaciji Programa rada, ostvarivanju politike Općine i aktivnostima Općinskog načelnika za 2013. godinu*, koji je jednoglasno i usvojen.

Jednoglasno je usvojen i *Prijedlog plana upisa učenika u prvi razred Gimnazije „Dr. Mustafa Kamarić“ Gračanica u školskoj 2014/2015. godini*, kojim je planiran upis pet odjeljenja sa 150 učenika. Jednoglasno su i bez veće rasprave usvojeni i sljedeći dokumenti: *Izvještaj o izvršenim procjenama prometa nepokretnosti i prava za 2013. godinu*, *Informacija o stanju zaštite od požara i vatrogastva, praćenju i izvršenju plana zaštite od požara na području općine Gračanica u 2013. godini*, te *Informacija o realizaciji Odluke o stipendiranju učenika i studenata u školskoj 2013/2014. godini*.

27. II. 2014.

**“Plenum građana i građanki” i u Gračanici**

Nasilni protesti koji su potresli Bosnu i Hercegovinu, tačnije Federaciju Bosne i Hercegovine, tačnije gradove u kojima živi većinski bošnjačko stanovništvo, izrodili su jedan specifičan socijalno-politički fenomen nazvan “Plenumi građana i građanki”. Tzv. plenumi pojavili su se u Tuzli, u Sarajevu i



drugim gradovima, a kao svojevrsan odjek tih zbivanja i kretanja takav inicijativni skup održan je i u Gračanici (ispred Osman-kapetanove medrese) pod nazivom “Plenum građana i građanki Gračanice”. Dogovoreno je da se „Plenum“ sastaje triput sedmično, s ciljem da formuliše svoje zahtjeve i upućuje općinskoj vlasti.

5. III. 2014.

### **Umro general Ekrem Durić**

Rođen 9. 2. 1925. godine u Bosanskom Petrovcu, odrastao u Gračanici, gdje je završio osnovnu školu, a potom je upisao Šerijatsku gimnaziju u Sarajevu, iz koje kao učenik, u martu 1942. godine, sa grupom svojih školskih drugova bježi na teritorij pod kontrolom partizana. Stupio je u redove Prve proleterske brigade, sa kojom je prošao čitav ratni put. Poslije rata ostao je u vojsci, gdje je napredovao do najvišeg čina u vojnoj hijerarhiji, a vršio je razne visoke vojno-političke i diplomatske dužnosti. Bio je i ambasador SFRJ u Vijetnamu, te poslanik u Narodnoj skupštini BiH za općinu Gračanica. Objavio je knjigu dnevničkih zapisa “Moje godine u Vijetnamu”. Odlikovan je sa više domaćih i dva strana odlikovanja. (opširnije: u rubrici „Likovi zavičaja“ u ovom broju našeg časopisa).

6. III. 2014.

### **Čijom krivicom se koči otvaranje novih radnih mjesta na općini Gračanica?**

Među gorućim problemima građana općine Gračanica i razlog najvećem nezadovoljstvu jeste i veoma visok procenat nezaposlenih: na evidenciji Zavoda za zapošljavanje nalazi se preko 9.000 osoba, od čega je njih 400 sa visokom stručnom spremom. Svima je jasno da nova radna mjesta u privredi i različitim uslužnim djelatnostima danas prvenstveno osiguravaju privatni investitori. Protesti i nezadovoljstvo građana su aktualizirali problem neusklađenosti prostornih planova općine i kantona, te nemogućnost pretvorbe poljoprivrednog zemljišta u građevinsko, čime su u

nekim dijelovima općine (u prvom redu na području Sprečanskog polja), praktično zauzete nove investicije u milionskim iznosima, a time i otvaranje novih radnih mjesta. Kako to ističe novinar Fahrudin Kurtović, u prilogu emitiranom na RTVTK, Općinsko vijeće u Gračanici je jednoglasno zaključilo da razvoju privrede, novim investicijama i otvaranju novih radnih mjesta nikakva planska nelogičnost i nedefinisanost, niti bilo kakva birokracija ne smiju biti na putu, te su upućene hitne urgencije prema vladi Tuzlanskog kantona, odnosno resornim ministarstvima. Mnogi privrednici i zainteresirani investitori su u ranijem periodu nerijetko izražavali nezadovoljstvo odnosom vlasti prema ovom problemu, odnosno “prebacivanjem loptice” u pitanju nadležnosti između općine i kantona, ali je načelnik općine Gračanica ovaj put javno obećao da na sebe preuzima odgovornost za rješavanje ovog problema, “pa makar zbog toga završio na sudu”.

Inače, novije analize pokazuju značajnu kontaminiranost tla uz rijeku Spreču, nizvodno od Modraca, kao posljedicu višedecenijskog industrijskog zagađivanja hemijskih tvornica s tuzlansko-lukavačkog područja, zbog čega je ono nepogodno za zemljoradnju. Zbog toga se u Gračanici nadaju da će resorna kantonalna ministarstva konačno odraditi svoj dio posla i da će administrativne prepreke za gradnju novih privrednih objekata biti u što skorije vrijeme otklonjene, čime se će biti osigurano više desetina novih radnih mjesta.

18. III. 2014.

### **Vanredna sjednica Općinskog vijeća: rasprava o platama i drugim naknadama u javnom sektoru općine**

Vanredna sjednica, zakazana za na inicijativu Kluba vijećnika SDA, kao najjače opozicione partije u Vijeću, imala je samo jednu tačku dnevnog reda, a to su plate i naknade u javnom sektoru općine, tj. javnim preduzećima i ustanovama. Pojedini vijećnici su imali brojne

primjedbe na službenu informaciju o visini plata i drugih naknada u javnom sektoru, navodeći da su podaci frizirani, te da nisu prezentirani puni iznosi cjelokupnih primanja, a na samoj sjednici su upućene brojne kritike direktorima, te upravnim i nadzornim odborima javnih preduzeća i ustanova. No, na kraju su jednoglasno usvojeni prethodno pripremljeni zaključci (koje je usaglasio kolegij Vijeća), a prema kojima visina osnovne plate načelnika općine ne može biti veća od 3,5 prosječne plate u Federaciji BiH; visina osnovne plate predsjedavajućeg Općinskog vijeća ne može biti veća od 2,5 prosječne plate u FBiH, visina plate direktora Opće bolnice Doma zdravlja i Gradskih apoteka ne može biti veća od 3 prosječne plate u FBiH, a visina osnovne plate direktora Vodovoda i kanalizacije, "Komusa", Veterinarske stanice, BKC-a, Centra za socijalni rad Gračanica i Obdaništa ne može biti veća od 2 prosječne plate u Federaciji BiH. Zaključeno je i da naknade predsjednika i članova upravnih i nadzornih odbora u preduzećima i ustanovama kojima je osnivač Općina ne mogu biti veće od 200 KM za predsjednike i 150 KM za članove, umanjene za 50 KM u mjesecu u kojem se nije održala niti jedna sjednica. Naknada za regres u javnim preduzećima i ustanovama i u Općini ne može biti isplaćena u većem iznosu od 50% od prosječne plate u Federaciji BiH, dok je maksimalna visina naknade za topli obrok 8 KM po radnom danu. Istovremeno je odlučeno da se smanji i visina vijećničkih paušala za 20% u odnosu na trenutno utvrđenu naknadu.

31. III. 2014.

### **18. redovna sjednica Općinskog vijeća Gračanica**

Nakon vijećničkih pitanja i inicijativa, te usvajanja dnevnog reda na kome se našlo 13 tačaka, vijećnici su jednoglasno usvojili Izvještaj o izvršenju budžeta općine Gračanica za 2013. godinu, uz još nekoliko izvještaja i odluka, kao i prijedlog plana upisa učenika u prvi razred Mješovite srednje škole Gračanica. Na dnevnom redu našli su se i izvještaji o radu Centra

za socijalni rad, BKC-a i Dječjeg obdaništa "Naša djeca" za 2013. godinu, koji su usvojeni, iako je nešto opširnija rasprava vođena u vezi sa izvještajem Obdaništa. Do kraja sjednice usvojena su još dva dokumenta, te je vođena diskusija o nacrtu zakona o novčanim podrškama u poljoprivredi i ruralnom razvoju Tuzlanskog kantona. U drugom dijelu sjednice obratili su se predstavnici "Plenuma građana", kao i predstavnici radnika "Grafopaka" i Olimpa.

21.-25. IV. 2014.

### **Održan Međunarodni sajam poduzetništva i obrta "GRAPOS-EXPO 2014"**

Sajam je obilježila raznovrsna ponuda, uz učešće 278 izlagača iz Bosne i Hercegovine, Hrvatske, Srbije, Bugarske, Italije, Austrije i Njemačke, kao i bogat konferencijski program, na kome se raspravljalo o više važnih tema s područja ekonomije i poslovanja. Sajam su posjetili i brojni gosti, predstavnici vlasti i diplomatskog kora, kao i iz poslovnog sektora. Sajam je svečano otvorio premijer Tuzlanskog kantona, a zadnjeg dana posjetio ga je i ministar energije, rudarstva i industrije Federacije BiH Erdal Trhulj. Jednoglasna je ocjena da ovaj sajam daje značajan doprinos promociji i afirmiranju privrede sa područja općine Gračanica i šire okoline.

29. IV. 2014.

### **Održana 19. redovna sjednica Općinskog vijeća Gračanica**

Dnevni red je na ovoj sjednici bio dosta obimniji nego inače i sadržavao je više od dvadeset tačaka. Vijećnici su, između ostalog, usvojili veći broj odluka kojima su regulirane visine naknada vijećnicima i radnim tijelima Općinskog vijeća, kao i visina naknada članovima upravnih odbora javnim ustanovama i preduzeća kojima je osnivač Općina; naknade su smanjene, u skladu sa socioekonomskom situacijom i zahtjevima građana. Na dnevnom redu su bili i izvještaji o radu i finansijskom poslovanju Doma zdravlja i Opće bolnice: o njima je vođena duža raspra-



va u kojoj je ukazano na brojne probleme u radu ovih ustanova, ali su izvještaji na koncu usvojeni, kao i odluke o imenovanju njihovih upravnih odbora. Do kraja sjednice, vijećnici su usvojili još neke izvještaje, nacrt poslovnika Općinskog vijeća, te nacrt odluke o općinskim priznanjima, a prihvaćena je i kategorizacija lokalnih puteva, u kojoj je između ostalog cesta Gračanica – Malešići – Lukavica kategorizirana kao regionalna cesta.

30. V. 2014.

**Umro Ćamil Naimkadić, predratni predsjednik općine Gračanica, dugogodišnji društveno-politički radnik i rukovodilac**

Rođen je 1937. godine u Špionici (današnja općina Srebrenik). Osnovnu školu završio je Banovićima, a mašinbravarski zanat, 1955., u Živinicama. Svoj radni vijek počeo je kao metalski radnik, 1956. u gračaničkom „Metalcu“, a završio kao predsjednik Izvršnog odbora opštine Gračanica, 1990. godine, odlaskom u prijevremenu mirovinu zbog narušenog zdravlja. Uz rad je stekao zvanje diplomiranog ekonomiste i obnašao gotovo sve najodgovornije političke funkcije na opštini Gračanica, jedno vrijeme nalazio se na čelu metalškog preduzeća „Fering“, bio pomoćnik direktora Doma zdravlja, rukovodilac lokalnog stambenog fonda (SIZ-a stanovanja), gračaničkih „Terma“ itd. Za njegovog mandata na funkciji predsjednika opštine (1974. – 1978.), Gračanica je obuhvaćena programom obnove saobraćajnica u BiH i konačno dobila asfaltni izlaz u svijet (preko Tuzle, Doboja i Srnica), sredstvima samodoprinosna izgrađena je prva faza Doma kulture (o čemu je pisao i u ovom časopisu), započeta rekonstrukcija i asfaltiranje lokalne putne mreže itd. U prisustvu mnogobrojnih sugrađana, ukopan je 2. 5. 2014. na mjesnom greblju Šabuša.

6. V. 2014.

**Nihad Halilbegović (Gračanlija u Sarajevu), dobitnik Plakete Kantona Sarajevo**

...za izuzetne zasluge u davanju podrške pravедnoj borbi za odbranu Sarajeva i države

BiH od agresije, kao i za doprinos u očuvanju kulturnog naslijeđa u BiH. Halilbegović je bio jedan od organizatora pripreme odbrane od agresije na Republiku Bosnu i Hercegovinu, te je obavljao dužnost komandanta Prvog štaba Patriotske lige u RBiH i člana Regionalnog štaba zaduženog za odbrambene pripreme. Dao je veliki značaj i doprinos u organizaciji spašavanja kulturnog naslijeđa u BiH. Inače je saradnik ovog časopisa. Priznanje mu je (kao i ostalim dobitnicima) uručeno na svečanoj sjednici kantonalne skupštine koja je održana u okviru manifestacije „Dani Kantona Sarajevo“ u prisustvu velikog broja gostiju iz političkog i javnog života.

11. V. 2014.

**Održan 17. festival dječjeg teatra BiH u Gračanici**

Na ovogodišnjem festivalu, čiji je organizator Bosanski kulturni centar i Centar za dramski odgoj nastupilo je 15 ekipa iz čitave Bosne i Hercegovine. Festivalski žiri u sastavu Sead Đulić (režiser), Mirela Trepanić (rediteljka) i Albina Junuzović (nastavnica) dodijelili su slijedeće: a) nagrade: za scenski govor – „Mala princeza“ (Dramska scena SPKD „Prosvjeta“ Prnjavor); za ansambl igri „Kako su postale ružne riječi“ (Katolički školski centar „Sveti Franjo“ Tuzla); za primjenu novih teatarskih formi u dječjem teatru – „Mrak Čudak“ (OŠ „Čengić Vila I“); za kolektivno autorstvo djece i voditelja – „Morska priča“ („Mostarski teatar mladih 1974“ Mostar); za najbolji vizuelni identitet – „Garavi sokak“ (Prva osnovna škola Srebrenik); za umjetničko pedagoško vodstvo Brankici Radonjić (Dramska scena SPKD „Prosvjeta“ Prnjavor) i Marici Lazić (Katolički školski centar „Sveti Franjo“ Tuzla); Nagrada dječjeg žirija za najbolju predstavu – „Mrak Čudak“ (OŠ „Čengić Vila I“); b) pohvale: za suvereno vladanjem scenom Medini Brajević; za uspješan kontinuiran dramsko-pedagoški rad sa djecom Meidi Bešić

*Ulica na Palama, 1912. g. (inv. br. poz. 1082; inv. br. negativa 2511)*

